



交游書翰

刊



交游書翰

第三冊

朱衡 萬安人 號鎮山 工部尚書

屠應峻 平湖人 號漸山 春坊諭德

萬恭 南昌人 號兩溪 副都御史

宋儀望 吉永人 號華陽 都御史

吳道直 定州人 號太恒 兵部侍郎

詹萊 常山人 號範川 按察僉事

侯一元 樂清人 號二谷 布政使

徐棧 常熟人 號鳳竹 兵部侍郎

沈繼美 保寧人 號龍山 參政

鄔懋卿 豐城人 號劍泉 都御史

尹臺 永新人 號洞山 南京禮部尚書

朱大器 南城人 號東源 刑部侍郎

劉堯誨 臨武人 號凝齋 都御史

王廷幹 涇縣人 號岩潭 知府

睦樵 周府宗正 號西亭

皇甫訪 吳縣人 號百泉 按察僉事

王叔杲 永嘉人 號陽谷 參政

凌雲翼 太倉人 號洋山 兵部侍郎

易寬 安福人號

胡宗憲 績溪人號梅林

胡直 吉安人號廬山

羅埕 泰和人號翰林編修

汪鏜 鄞人號遠峯

許應元 錢塘人號茗山

汪道昆 歙縣人號南明

徐中行 長興人號龍灣

黎堯勳 樂至人號樂村

劉應箕 資江人號平州

傅應禎 安福人號慎所

吳桂芳 新建人號自洲

李遷 南昌人號璠峯

伍令 安福人號魚山

劉慈 萬安人號唐巖

曾承芳 惠安人號龍山

吳百朋 義烏人號堯山

王世貞 太倉人號鳳洲

吳國倫 興國人號川樓

劉儒 群牧所人號黃溪

聶靜 永豐人號白泉

周光鎬 潮陽人號耿西

交游書翰卷之三

朱衡

往歲獲侍函文深荷甄錄自後乏便未由一致起居之私然感臆品鑑傾顛楷範則寧朝夕寘耶去冬於友人所讀師家譜近復自徐御史華原睹全集萃經史之精握騷選之腴炤盪三靈輝麗萬有其信今傳後無疑矣奚但備諸體成一家之言而已哉雖然此特師餘事耳聞旬宣之政寓楚而去有思在汴則生有祠方岳流惠屏翰凝猷誠體用之學經緯之文也已夫居二省之日不為父左右之轄不能專而且若爾况今位冠中臺名簡上衮總憲秉鉞以臨全蜀之人全蜀之人其有不如楚汴之間也乎即日當

振文翁之教而紹申崖之裔將見巖瞻增聳棟用彌隆門  
下士若衡者藉承寵光且渥矣非佞茲因差使謹布下忱  
隆寒呵筆甚為草率伏惟尊諒不勝悚息

拜違師席將及廿載道里緬邈跡不從心自甲寅歲遭草  
土之艱不復有人間念延息強出塵鞅奔馳乃於興居之  
候亦且踈曠念惟生成之德隆天厚地未能稱報萬一而  
庸誑之財隨試未效無以光大師門作人之功衡之罪於  
是乎不自解矣謬承一鎮值歲不登寇盜滿目饑口待哺  
顧法度弛廢倉廩空虛銷弭長活二者並難奈何惟師貞  
忠性篤經濟才裕士林喁喁日望安車奚止深源安石之  
出世道終必有賴願慎重福履以答群情匪在門二三子

私囑爾也謹因翔羽肅狀狂忱伏乞崇鑑衡何勝懸切  
衡自弱冠以文字受知於門墻及登榜後最荷教植迪之  
以道義而期之出於等夷之上每一念之輒自感激從仕  
中外垂四十年無敢放逸勉於官常者正恐貽玷尊師  
夙昔而才識不逮時勢復或相格遂不能大建立以光門  
墻循而省乎寧不赧然愧也且尊師抱經綸之具際此熙  
朝乃衡具員六曹又不能請於君相早馳安車於四明之  
間則所謂愧者罪也遠承手翰奉讀祇領肅此宣謝惟珍  
重興居是祝

積仰台範山川靡間而河役告成且辱名筆獎許過情深  
自慚悚茲者復煩尊翰千里遠將仰惟宗師動靜萬福幸

甚世路清夷安車屢下獨不聞至明水之澣此門人小子  
日夕所為結念而望淺言輕不能光揚宗師盛大德業慚  
負寔多復何辭耶外諭以質之銓郎渠云正歷八年雜歷  
十三年此規也人旋肅此奉復諸不能悉伏乞台照  
老師以先朝重臣海內耆碩道德文章卓然名世推之政  
則既輝赫矣即此已足勲標汗史名著藝林然海內人士  
猶顯然以大究厥用為望河清可俟人其舍諸茲萃當代  
之文以範世使片詞一善皆附托而不遺才士墨卿咸蒐  
羅而罔漏至如鄙人之薄技亦得廁名其間何其幸歟回  
思小歲獲進於宮牆而今者又蒙甄取此古人所以有知  
遇之感也猥以序文見命安敢以不敏辭復勞賢公子惠

顧敬此陳謝伏惟保護玉體以迓渥眷以康壽祺幸甚

鄔懋卿

曩歲猥承賜教良用感戢倏忽三年未由承候有懷徒耿  
耿耳常念翁平生心事皎若天日文章昭若雲漢節氣勁  
若金石德化之及物煦若和風甘雨擔荷國家大事屈指  
當世幾何論者不諒其平日之素指摘瑕微以哢哢然肆  
其訾毀何哉名重而毀自來也公論至今猶為不平而翁  
於此蓋自有處之裕如者矣道之行也可以濟時可以化  
今否則著書立言以傳後亦自有名教至樂豈以此為忻  
戚哉懋猶不免於戚戚者門下之私情也懋受翁知愛甚  
厚昕夕思慮曾無絲粟報答其跡似疎且簡而此心寔無

一時不在翁左右、近以庸劣仗庇、叨轉皆翁生成之功也、  
敢忘所自耶、所圖以報塞者、惟勉於敬修、以求無貽師門  
玷耳、不知將來得寡過否、近日倭寇猖獗、寧紹擾害已極、  
不知福履若何、日擊時艱、諒所不能忘情者、而中外支吾  
其亦何以逭其責耶、偶因風便、謹勒短狀、奉候起居、伏惟  
為道倍加珍愛、以膺天眷、是愿是祝、

屠應竣

自丁酉之秋、再違光範、嗣後得樂府之賜、頓首啓誦、恍焉  
若游釣廷、而聽金石絲竹之音也、一倡三歎、有不足言矣、  
竣也鄙日、懷高誼、久以旌節省、方展向難、豫不敢奉書記、  
室執事德宏、政又聲寵、敷于清時、此薦紳所共仰、而僕積  
咎叢、遲遲、碌碌、無足為故人道也、恭惟聖明崇錄英賢、  
執事又勞外臬、行總內政矣、鄙人之私、無任顛企、適時雨  
川公知便道、榮歸、謹陳下款、惟垂照不宣、

尹臺

頃歲因長公還、便僭附興居、計通入久矣、愚戇、觝權幾不  
免讒吻、噬毒幸活、耕隴多年、皆荷 肅皇帝天地大恩、閉  
戶屏居、不敢一交四方之問、東望甬雲、徒慨然於舊游、陳  
迹已耳、茲不圖簡書忽相及、懇辭既莫之獲、勉為此出、祇  
益巖譏、谷讓之慚、適屠曹監君至、得敬悉、近履不勝千里  
遠慰、聊附其往、率此寓布、區區遙望、四明天姥之間、寄懷  
高風、臨楮、倍劇悵悵不備、

萬恭

恭江右鄙人也生髮未燥覩翁校士西江盡得之牝牡之外伯樂以神相馬東翁以神得士即今為天子使少効駑駘孰非四十年前天廐中所秣耶金陵奉侍則翁又識恭於群槽以為他日可登峻坂負鹽車此數十年者雖屢試屢蹶然亦汗首仰秣報伯樂矣長公過濟上道捧手教起居萬福甚幸且得文範八九讀錄及雕蟲嗟翁德業文章萬世宗盟乃昵駑駘及其尾鬣得無天廐之累耶舟過西杭悵望東海巖巖大老實勞我心專遣承役賫鄙事申謝將伯樂昵之而不變抑匠石過之而不顧也玉體七袞大屬朝野之重願言崇誌以迓蒲輪恭不任悚息殷勤之至

朱大器

器以陋劣辱在門墻自習布武之初仰藉升堂之教時維章句腐儒靡所開曉一負深知遂幾淪落尚幸振策之言書紳猶在而着鞭近裏漸爾循途念無可以光澤高厚終期兢兢不失法門耳向歲守宛師翁重贊留臺亟欲東沿抒誠北面忽殊逢邁事莫從心昨蒞三吳瞻望越山亦云伊邇適不百日解去未遑走只尺之書奉候典謁此其為罪庸可逭乎茲於燕臺得侍伯仲祇承緒論竊仰風神如見翁也駢膺一命之重克展三俊之才覲耿揚休門業有地矣助喜無任稱賀無任伯兄榮旋濶踈負媿仲兄謁選有期自當朝夕請誨第不肖官方靡曠年亦衰遲即遇清



朝分當振拂師翁其終教之倘得持循遨遊盱水俾倦鳥  
猶遂和鳴於高岡蹇力不至蹶足於峻坂終始造就皆明  
賜也敢茲 啓仰謝鴻慈并布私衷奉候萬福幸惟崇護  
以豐壽祉不宣

竊聞古之君子端揆於朝則平章九有而沛天下之澤  
車於室則羽翼六經而垂百世之師此士人之上願而每  
讚全才則未易見也昭代名賢惟夫子無之正色就列迄  
成大勳却掃旁搜洞徹今古所稱耆德垂鴻休於當年流  
芳郁於百代者非邪不厭不倦乾乾終日正謂弟子不能  
學也恭承清惠更荷遠教愈切瞻依南北睽違不勝稽首  
長公善治不扶自植次公馴雅英譽日聞皆於門業有光

冠紳咸為助喜慶積之徵繩繩未艾敬賀不一器不敏年  
來遲暮重辱門墻虛糜懷慚久思振拂方承夫子教督未  
敢造次呈狀耳使旋肅此謝教併布區區外具不虔無任  
悚仄統惟俯賜台照不宣

宋儀望

儀望不奉台教已二十年矣自惟菲薄無可比數中才謬  
歷仕途強半家食屢進屢退曾無尺寸之建夙志謂何徒  
有慚愧耳往歲承乏閩中督學倥傯行役未便一奉起居  
懷仰之私與日俱積繼得令郎長公來令樵川不肖適因  
家難解組西歸會間得奉老師翰教新刻之惠捧誦感激  
非言可喻去春勉強還閩輒有入賀之行途次尋復得轉

官之報倉遑移家託庇苟安頃幸獲接二位賢郎復拜尊  
教備悉起居清勝喜慰殊甚長公高才藉甚八閩次公温  
然如玉縉紳見者無不為老師稱慶况素辱教愛如不肖  
者我頃喜朝廷清明政府嚴肅時事更新士風不變真千  
載一時也不肖碌碌如昨無益明時不知老師何以振之  
顯望顯望草率裁復兼伸鄙私種種請教非楮可悉伏惟  
台照不宣

劉堯誨

堯誨後學每喜聞天下長者舊嘗讀芝園集諷詠千百言  
雖不盡解而神交於鑑湖禹穴若得而尚羊於其上也覺  
而後遠不勝惘然既遊兩京嘗從高賢之後索談名品數

東南之彥乃獨委心於下風何令人企慕至此顧明翁已  
遂閒遜美矣而彈鋏之士尚傲寵於嚴壇操觚之流每乞  
靈於玄圃明翁方且托漁釣而逃之空濶之外而求者猶  
疑於泖溯往來之間其將得乎匪佞匪僕待罪海邦暮  
月矣恥姓名微薄不敢僭通於門墻然年來懷古景行願  
望見猶切忽承明問齒及荒慵華牘清裁幸已竊嘗芳潤  
矣三飫之而不能釋口乃知明翁之滋味我也固將藉此  
以寄不朽榮幸可言賢郎得同事一方諸凡荷賴寔多即  
無來教已心識而別目之也李子旋浙促促具復不恭容  
當專啓馳候統祈慈鑒不宣

吳道直

丁卯西郊之別癸酉始付一音海上仙人真弱水隔也憶昔承乏大邦某方水利翁必教之興某方盜害翁必教之除不肖未嘗不以師式事老翁翁亦未嘗不以善人視不肖年來往來於東土西湖之間遨遊於嵩高大河之上每遇頌及翁者道誼骨肉之雅未嘗不侈為美談也但念翁著作滿金滕平生精力垂照于古今春秋高矣思慮營營得無為身心累乎昔楚王問道於僧僧終日默然王曰何為不誦經曰出息不着萬緣入息不落陰界流轉是經百千萬億湖心書屋市廛大隱謝心目之勞怡神湛性以為千齡之卜不亦善乎得會沈春元聞翁禧履甚悉吳生再至非敢疎故人河藩宗黨造言者多吳生山人之服見者訝之使得旅進則萋斐立至矣然敬吳生則不毫末減也仰辱天葩綺幣來自海濱敢不三肅拜命茲謹薄將告虔千里鴻毛伏惟尊鑒莞存幸甚

王廷幹

陳子來承翁手翰意旨婉切眷念勤厚非廷幹菲劣所能堪也感切胸臆翁望重寰區功存廊廟出而經濟以匡王國靜而著述以淑後人恭讀芝園外集鑄詞秀俊造意弘深考古以證今因天以驗人憫貪墨之干紀懲偽妄之亂真一洗時俗之弊大還醇古之風當事者用其一二亦可以興致治平俾我翁秉鈞當軸則四海蒼生之福當廣被矣匪佞匪佞廷幹屏跡山中涼薄殊甚諸兒俱淹滯庠序

長兒文炯向翁知念者雖廩食領批科舉九次尚未一遇  
仰視公子敷歷京省如在雲霄而翁猶謙讓尤見盛德之  
至爾思欲為西湖之遊侍翁左右抵掌而談天下之事以  
慰契濶以敘平生至願茲已啓東明翁不知得遂否也外  
小詩附扇聊見下忱餘情不悉伏惟起居萬福不具

詹萊

嘗聞之傳曰千里而一賢猶項領百年而一聖猶旦暮謂  
其得之難也惟其得之也難則其聲氣之求應志意之投  
合宜若虹霓之相射也雉鳴之相和也磁鐵之相引也輔  
車之相依也其有不盡然者則情隨時戾性緣勢奪已耳  
伏惟明公非周孔之道不蘊於心非孟荀賈馬之詞不宣

諸口雖掀揭之猷未竟而山斗之望已隆萊自垂兩髦學  
書記已聞今問若以為古之人焉及其筮仕金谿既以憂  
歸之後明公始奉撫巡之命乃謬蒙追錄微能而擢延之  
譽此固自天之貺也比復京師始得伏謁於階祀之下明  
公亦若舊知識開和顏色賜謦咳接杯斝之懽然不踰時  
奉除書而去固已天淵門墻矣又不數歲而明公引身以  
就田里則益褰裳未由也幸而天遺宿老以著龜後迷蓋  
若懸繩以待枉木蓄藥以俟病夫也而萊亦已謝塵鞅歸  
蓬華者逾十年既近在邦域之中而又舊蒙雅遇乃為羸  
病所拘持不得負篋曳齊親奉杖履而卒業焉蓋誠為時  
勢所移奪非真性本情也萊又嘗念伯叔倡和之什兕虎

率野之談古之君子不必日親就左右通慤也進而黼  
黻王業退而策篤聖功苟有同焉則亦未為乖離也當今  
學者大弊掇華菁不究根莖肆涉獵不事精專采子史不  
循經典崇超悟不遵第級騰口說不敦踐履競圓融不厲  
廉介此蓋滔滔徧天下而是矣非負道德之實而建高世  
之望者旃騶虞而招之其灑滌滌汨不知竟將何所抵止  
也然則非閤下之任而誰任歟譬之御與田也明公請推  
之若萊也等者引繩而挽之請畊之若萊也等者荷鋤而  
耘之庶少有濟乎萊又念古之人不能親就函丈而受業  
者或使其子弟代行今因二兒生員在泮在庭業經之行  
敬使修起居望見有道之門夫經泰山者屹然立望東海

者泮然廣見大人君子者肅然化既自有益於得矣下執  
事誠推夙愛幸而進教之又轉以一言教萊使均知所向  
往則踰於徒抱芝園拔尤等集錄細繹者倍蓰何如也外  
呈拙刻并薄儀具另幅統希台照不一

睦擇

不肖獲廁門墻之末二十餘年矣屬者不揣乃以先祠仰  
干大作深荷不鄙即賜揮毫雄詞偉製雖遷固奚讓今之  
號稱名家皆當北面矣先子何幸得此所謂華衮之褒百  
朋之錫誠無以過也既勒貞珉聚觀如堵先祠亦托傳於  
不朽矣高情厚德川嶽並長當使世世萬子孫仰戴匪特  
光藉一時已也吳子婦草草先此附謝容少暇專馳以布

不盡外近稿一冊求正更乞不吝斤削幸甚

不奉翰誨者兩逾年矣吳山人至獲拜瑤函足荷記存第  
無南北之緣未能一侍道範徒增企仰耳僕每謂學士大  
夫重耳輕目殊可慨歎三代以上即不論今之譔述吾翁  
曷讓遷固治猷吾翁曷讓丙魏往往制策諫劄不知求之  
目前而遠引古人是以屈原發已矣之詞而董生有不遇  
之感也雖然吾君不欲平治則已如欲平治豈能舍翁它  
求哉惟翁自愛行將有物色者矣非諛非佞吳子還附此  
布復餘俟嗣謝嗣賀也南望不盡縷縷

侯一元

自髫齒時則既望見長者於雋彥之林矣其始以明公天  
人之學灑噩之文單詞隻翰迺王迺金鴻編巨製條貫兼  
總斯則藝苑之獨步也既而明公才為世用則儒吏名法  
惟意所出賦政四方播神君之譽登踐九列蹇王臣之節  
於是風聲溢朝著澤潤暢八埏斯又經綸之弘致也直比  
朱絲清若玉壺明炳秋毫而養之晦威稜夏日而濟之寬  
至其瑟如玉瓚密爾退藏九德成矣百行備矣斯又斐恭  
之上善也夫以若斯之巍巍也八斗之才疇分其二累百  
之驚孰當其一而其恭溫溫焉儀抑抑焉聞善則若驚求  
士則若渴雖以元之陋劣而珠璣之歎玉屑之談時時及  
焉元所聞於人人明公之於齊之俘燕之石也薰而沐之  
不啻以三韞而襲之不啻以什矣方時文盛真家珍隨和

人蓄龍驥而明公和樂之門四方輻輳以希一盼而賈十倍者豈鮮哉而元奚取焉竊獨怪之旣而思曰不見明公善行錄衆妙方耶仁人之心蓋如此矣藝善則若已有而恫瘝則若迺身是故滌器櫛桶君子納之無擇人也牛溲馬勃鑿師蓄之無擇材也推此明公之有意於不肖也固其宜哉夫馬也鳴噴於孫陽士也投軀於知己常思負笈羸粮跣足執贄庶以布席分徐吾之燭執筭陟扶風之樓聞所不聞發我醞覆而病懶杜門迄未能出區區之愚亦且憚茂先之博物以踊躍為不祥畏子賤之先知識陽鱉之少味醴甘而壞故不為也趙使之來猥辱長者先之瑤牘重以鴻製發函燦爛五內震駭昔皇甫忘賤于逢掖元

禮忘年於文舉中郎忘形於王粲古誼超然方斯蔑矣誠非小子之所宜蒙獎誘過情忍然汗出潛味盛旨其無乃以元著教也乎哉蓋今學士所尚大畧可言取材則欲侈構辭則欲綺肖古則欲似三者皆元所乏也迺其區區之愚則在於效心而言譬若春蚓時鳴瓦缶應筵下里抒情聲盡則休爾此不暇於作者之矩矱而若有合於吹萬環中之旨故雖其不侈不綺不似猶明公之所予也非固予其不侈不綺不似者也予其效心也若夫效諸心而侈而綺而似者斯則明公之所自有而以範時正俗者也故曰以元著教誠若斯言請從隗始日月易徂人師難遇玄言未聆素毛已垂倘狗馬之年未先朝露則夫子之墻猶思

炳燭臨楮不任區區不宣

元不佞幸托桑梓末行仰承先達沾溉芳潤景行之思已備前札顧門墻在望負笈未能勞結徒勤困蒙猶故云如之何所以教墨再頒而捧函距躍中夜以興者也伏惟天壽平格七表甫躋帝命維新衮衣改玉周公之貴不厭下士衛武之耄不廢問學生人之懿今古鮮儔載諷說林諸篇以左國匡劉之撰發天地聖人之蘊譬之天府何物不儲真可羽翼六經鷹揚藝林矣見索拙稿將賜郢裁此狂簡之幸也第元幼學不力中牽纓冕間有撰述多不副心向者兒輩遽以灾木誠慚於出之欲以秉燭餘光稍飾嫫母乃敢見於師氏耳茲承善誘之盛慚懼感激不敢再稽

謹上初續二稿共十二冊臨楮不任汗浹伏惟長者矜而教之使者立發草率先謝書錦之堂華如桃李願從珠履芘榮食實將有期矣區區之誠書何能喻不宣

頃者盛使一再至温俱曾附啓上候台履惟天陰隲斯文綏我元老祺壽無疆為之宗主宰籠百氏貫綜九流俾前脩燦然之緒不墜於地斯乃魯叟所以盛於百王也乃以卷阿之車濡遲於磻叟翠茨之服未登於新朝以為相公缺望者詎可謂知類哉且以元之愚尚能夷猶於屠羊之肆自足於支離之德而况相公洞視千古者乎伏惟大製體備百家卮言日富天地之撰悉效於前不可復加矣惟是六籍所垂性命之奧自朱陸以來離跂角立未有能一



之者也恭惟我公高揖千載進退今古無所與讓元犬馬  
餘齒倘未先朝露猶冀聞懿戒於淇澳傳遺經於伏氏則  
退而沒齒於西河之上不恨矣高山在前無日不仰偶聞  
中白王文令親應氏之便敢附上起居屬以兒病迎醫懷  
抱甚惡辭無倫次美墻死在肩笈有期統須面陳不宣

皇甫汈

頃王子百穀還辱損華緘藻集端拜展誦光彩炫室不啻  
奇琛異寶何自而降也且謙冲假叩獎誘過情非所敢承  
緬昔枉芳訊於清源挹光塵於都下彈指三紀餘矣公方  
周歷臺省而汈乃播遷州郡飛伏垂跡音驛罕通然歎猷  
遠邵猶或相聞至篇翰流傳間亦快覩蓋公玄晤夙超匠

心獨契正脩辭者之所私淑而談藝者之所折衷也既而  
暫解本兵聊反初服娛情於山水殫志於鉛槧著作日富  
造詣日工矣令郎佳士過矣獲瞻玉樹恍對瓊枝惠及數  
帙幸窺一斑茲蒙全示因得覽知文以班馬為準而吞吐  
六代成一家言詩以李杜為宗而綜括三唐亦成一家言  
是謂集大而非具體兼美而非偏伎也夫文不難於鋪敘  
繫結而難於波瀾光焰詩不貴於占綴綺靡而貴於興寄  
才情公如雲蒸霞鬱變幻百端河決川流一瀉千里波瀾  
渙而光焰長興寄深而才情贍斯指焉無盡而味之有餘  
也諸家之評亦畧相似歐與楊顧欲探之六經及於濟世  
無乃宋人然失之固矣是耶非耶公自得之汈免官還山

杜門却掃亦思畢其小乘附諸大方而橫遭兵子之變累  
世所藏祕書擲取一空平生所撰稿本散逸殆半監司非  
但不能理其寃又從而抵其釁抱憤棲病齒髮墳老學植  
益荒良用悒悒近兒輩稍稍芟輯無足為高明獻也夫吳  
越相距匪遙每思泛姚江探禹穴踰四明以訪茂嶼諸勝  
倘山靈有知人願果遂懷嵇公而命駕御元禮以登龍良  
晤有期書不宣備

徐栻

憶自奉違台範修幾易伏臘矣緬思疇昔蒙吾翁收錄門  
墻特賜荐拔古稱知我之恩與生我者等感佩寸衷其曷  
能忘顧驅馳南北山川間阻未克時候尤用依依惟吾翁

勲猷赫奕聞望茂隆固中外所傾注也乃得早遂高致以  
怡愉晚福肆情四明名山川之間於翁得矣如天下蒼生  
何哉顧聖明敷求化理寤寐耆碩如翁宿望當不次簡召  
矣東山之卧其能久戀戀乎此殆天下蒼生之同情而栻  
之至祈歟栻自朴直以言見忤飄塵有年幸際熙時叨撫  
大方是廟廊拔滯或有取於舊馬之識途然不知蹇駑之  
資果能副驅策致千里乎未也且值大侵為灾陶貢告苦  
瘡痍病甚雖經請恤媿無毫補日益冰兢惟冀吾翁素愛  
更以過化成法誨示栻雖無似敢不矢竭涓埃以圖不負  
朝廷作養稱塞吾翁誤知也哉顙望顙望謹此恭候伏乞  
鑒原惟珍攝以膺殊眷萬祝

王叔杲

杲憶在髫年曾侍翁於清源舟中翁以通家子弟猥垂開  
 迪屈指今三十餘稔矣賤兄弟靡日不念之也後以先人  
 墓銘上請時方在衰絰不獲躬詣辱敦夙誼慨賜之銘每  
 欲一登龍門冀伸下款竟蹉跎未遂缺然在心頃者承翰  
 教遠臨捧誦不勝悚仄恭惟吾翁耆德碩望海內仰之如  
 山斗賤子謬竊通家不能修一候問至塵尊長見存愧罪  
 誠無以自解念杲晚叨一第兩縮邑符復廁郎署濫竽樞  
 屬者三四年矣而漫無所自見懼有玷於先人羞無稱於  
 先達行將掛冠東歸當走四明山中追攝杖履也使告  
 旋草率占復凍筆不悉所言統惟尊慈炤鑒

杲忝竊通家子姓之末記髫年曾觀台光忽忽三十餘稔  
 矣山斗在望上謁無繇顧屢塵尊文念及往年艾叅戎使  
 者之便曾勒寸箋後遂領郡魏博更無從覓便嗣啓先叔  
 遺文辱翁序錄往歲家兄寄至郡中杲讀之泣而且愧篤  
 誼如翁誠非今人事矣杲夏初濫叨吳中之命歸途衝暑  
 為病魔所困是月二日方抵任緣武舉屆期至郡料理適  
 李太僕持瑶翰嘉編遠辱且卒卒告行倉卒裁復未罄所  
 言統惟台慈炤鑒

沈繼美

美叨役滇藩三年兩辱翰教寒宅下又承厚惠愛至渥也  
 春初本圖入賀便還臨行乃冒茲轉此皆平日誤蒙眷遇

吹噓之所致也豈敢背德重念逖矣西土得藉重明公保  
釐川北之饑旣已非常而西番之難亦復孔棘微我公在  
其孰肯盡心極力為之憫恤戡定邪故嘗謂公以明作起  
事功以文章經世務身兼將相之才速奏安攘之績非所  
謂振古豪傑邪而司論議者仍復云云恐非所以持公衡  
而定國是也聖神在御固自有雄果英睿之斷而不眩於  
群議者為可恃願無勞慮也謹此專人奉候起居兼伸謝  
悃不盡台鑒幸甚

凌雲翼

伏自拜違台教歲月屢易向承之豫章凡所規畫俱自撫  
綏更定諸司猶恪遵不改恒如親侍左右夏間叨轉東甌

馳驅戎馬久缺專候門墻乃辱手翰及以瑤籍惠教再拜  
展誦信當今文章政事稱為全才者海內一人而已非敢  
為佞顧以天下日漸多事東山重望朝野想見丰采如葺  
理垣屋著述詩書若將高尚終其身者恐門下尚未能也  
翼濫竽地方海患未已茲聞中巢賊幸連敗之擒斬六百  
而攻燒者倍焉近方底定明春之事殊未可測四明休戚  
相關有備無患時望留神使旋謹此附復容專修謝伏惟  
台照幸甚

翼僻守海陬久不獲奉清教景仰日甚恭聞老先生家居  
日惟著書立言凡古今興衰更革大故莫不綜核討校而  
於時事變態猶時切惘瘵隱憂以故望日益隆名日益盛

海內莫不想望丰采以出處卜安危久矣辱在後進能不為世道稱慶哉海上之患兩年幸稍息肩但禍本未除蔓延可慮今春事勢未卜若何且財匱於加徵兵疲於冗食根本之憂更有深於外患者此惟可言于門下其他則必以為迂且狂矣惟門下終教之未悉欲陳伏祈為道加愛幸甚

易寬

逆旅未由效芹罪罪伏承尊賜頓首登嘉不敢上却顧中心弗安爾尚容尚容仰惟明公望重海宇方切簡眷以握鈞衡以主張世道而剛方直大之氣壁立萬仞不與俗推移斯其所以異也彼翕翕訛訛者自將漸化冰解其能於我有無生愚鄙敢以夙昔誨諸生者執為官箴而重於明公質焉行迫未能趨謝瞻企薇垣伏楮耿耿

吳桂芳

憶昔老先生秉樞南都不肖方待罪維揚時得自通候問然尚以一江之隔不獲遂參對之私為恨嗣是門下遜膚林麓日厯海內東山之望而不肖馳逐畏途東齊南粵行踪靡定蓋不惟恭聆警效之私未由直遂且併向之所謂通訊於下執事者亦復缺然耿耿之秉徒切延佇罪悚罪悚入春以來兩叨遷敘皆得貴邦雖深以不勝負荷為慚而實重以得遂瞻依為慰顧右使官屬閒散而無巡歷之責所謂星社德里盈盈一水又無因而至焉悵然之悵其

何能為言耶真切真切仰惟霜露既凝台候歛祉翹首四  
明無任欣幸茲承小暇謹勒小狀願申問安之忱臨楮不  
盡所言伏干順時為國珍護以綏即日簡召不宣

自己未秋於錢塘兩拜手書是冬即聞先人之變匍匐歸  
廬哀病相尋杜門三載諸凡長者通訊盡至踈斷蓋非敢  
故自菲薄實於情於禮有難強者屏迹葦門自甘廢遯昨  
秋時局更新不意叨有鄖中之補今夏蒙恩復有河上之  
命勞薄享厚內愧實不自禁然皆仰仗教植之庇所及也  
敢不拜賜候代端居忽李都司奉到教函無拜嘉詞之寄  
東望浣誦穆如清風感甚慰甚國朝文獻遠邁宋元然體  
裁風骨實自弘正以後為盛筮璫文衡之選病在太早若

近代續集則又猥畧不足傳翁當代宗匠宜其不容忘情  
於此也斯世斯文之幸其何可言欣忭欣忭尊集想已成  
帙第不識為卷若干共計葉若干倘記室有暇乞以目錄  
備謄一通見示俟知言有力之士當持以轉告之庶必有  
得於翁心之同然者起而力任其傳永之勞也如何如何  
山中無可將敬外具不腆殊愧太俗惟翁鑒原時次高秋  
伏干為道珍番以綏日下特召不宣

胡宗憲

昔人有云蒲柳之姿望秋先零松柏之茂隆寒不衰僕年  
齡甫過五十而視茫茫而髮蒼蒼精神力氣迨如八十老  
翁蓋真蒲柳之質無復隆棟之望矣天下不可謂就無事

朝中一二元老當之有餘如僕衰朽何足齒錄所憾我翁  
內聖外王之學可方古人雖擬之夔龍亦不多讓亦未見  
元老有推轂意使志士有空虛之歎為可惜耳僕自幼不  
文本無經世之畧遭時邁會幸成微功過分多矣敢復有  
再出之望惟安心林下鄙性有山水之癖亦頗習堪輿之  
事近得一二吉地頗覺快意介翁有書見贈云山中寂寞  
之味亦頗嘗盡僕亦云云所賴令姪孫石里公祖俯念屢  
世通家曲加愛厚使林下之人頗有顏彩晚秋正當賤誕  
得翁元老存念遠賜教言無以厚幣使腐草生華山川增  
色百拜領受如覽天章而登仙品喜慰萬倍喜慰萬倍令  
郎震世奇才雖不假科目發身亦可方宋之二蘇立身揚  
名以垂不朽翁不必為之多慮也大兒桂奇今科不第行  
當小就生亦不以掛懷抱也芝園集想已大成如此學究  
孔朱而下豈可多得豈可多得立德立言翁亦可以自慰  
矣何如何如臨楮不勝瞻戀跋慕之至

李遷

遷菲才末品繆以諸生親炙門下時山斗峻嶷不妄假借  
乃獨於不肖生屬意焉誨言諄復不以為勞參侍往還不  
以為昵以遷雖初學異日成就可觀此寔恩師面命之言  
不肖生用以感激自奮者也乃落魄十年始克竊取末第  
復三年于茲無一建明可為師門光者又惰慢因循不即  
走候台履罪何勝誅爾者備官南都幸與甬翁老先生為

屬吏推念門下教遇獨優即遷策勵駑鈍無能報稱唯勉  
自樹立誓永不負明訓而已更企老先生有以終教之仙  
臚止上擬於龍江瞻候不識可遂願否因幼官差便謹具  
蕪牘菲儀奉布下私餘唯順時珍番以須爰立不備

遷昔從白下拜違台席今且三載矣仰惟峻德殊望海內  
之士莫不瞻企以得被耿光為慶况在及門之徒曾辱甄  
拔者乎邇者喜聞開府西川敷和申威全蜀賴以寧宇即  
苗獠稍肆不靖然在戎師恩信軍被所以易頑為順化賊  
為民蓋又一忠定公也遷聞古之鎮蜀者多矣獨忠定至  
今尸祝為其寬而日威嚴而見愛耳諸生今日所仰望於  
我師者其亦在是

臺從遠臨重辱教重存竊念鄙薄

庸流誤蒙不棄深懼無以報稱萬一竦死竦死尊集頒賜  
珍重不啻珙璧正席莊讀數日復為具眼者奪而去之其  
愛且傳若此異代可知已遷竊祿閒曹悠悠歲月曾無寸  
進可以上聞謹具蕪函附致謝私餘惟為國崇護以須大  
拜不備

胡直

直謫陋幸從結髮出大賢人之門今忽忽近白首矣往在  
句曲締瞻環璋握衣秦淮之濱撰杖雷平之館獲奉矩誨  
匪一朝夕第學謝侯芭才非王粲叨從問字之末繆蒙倒  
履之榮仰負師門媿惕多矣緬惟明公夙挺雋上之才寔  
抱傅姬之志霖雨舟楫天下渴之久矣獨卷跡東山藏景



林麓安石不出如蒼生何此有識所為含嗟奚獨在門之士已乎然舊德彝勛宿簡帝衷鼎鉉重瞻豈越旦夕時事之弊極矣海內康濟屈指三四公舍明公誰先茲來族兄胡日守備尉貴邑亦幸早從校試之後誠可謂宗依有地矣已托令姪孫石里長官仰于弘度不惜教督倘遂生植感恩何極因風裁訊附申祈仰臨翰不任鄉往

伍令

自違道範更幾星霜大雅著述煥布海宇間獲披覩益增感慨私念大冶弘開曾勞鼓鑄而濩落不中其謂之何夙夜策勵幸收晚績矧以職事得瞻闕里而覩官牆扣拔自甘者備數於十二樓之列喜慰可知第以門弟而禮之大

賓師固為地方重命使而處之踰分非令所能安者藜藿之腸獲飫候鯖河伯之量擴之海若喜慰又可知也坐羈簿書未緣裁謝東事將竣獲戾士民苦不自知近欲稍去蕘莠以殖嘉穀而狐鼠之索未免城社之礙憎茲之口或緣以起義命自安亦不知所忌避也師其何以教之方慰扣趨遂敢干求非不知為狂瞽緣先伯父宦績在明士風之厚至今尚蒙懷思而衮衮之贈於郡志已先拜矣茲具狀以請如蒙慨諾俾得借重有道以垂不朽伯父之鬼神將嘉賴之豈特令與若子孫之私感已耶附陳不腆均冀台鑒望風無任俟命之至

羅堽

自壬辰秋憲節按敝邑埕以諸生進預考較過蒙獎拔緣是幸鄉薦於甲午戊戌之春始濫釋褐皆叨我師一日之錄遂席終身之蔭其為感激豈言可既每自悔恨于時以勢分懸絕不敢造次請益以聆警效然庶幾得侍於他日也自執事長憲滇南埕萍蹤南北末由致只尺之書以申罔極之謝每一念及如坐瓊鉞茲不孝罪重禍延先母奔訃旋聞執事以右轄將臨東土埕雖在憂戚中自慶必得償數年之願不意仙槎既過半日始克知之翹首雲天徒興悲歎塵土俗緣不獲遇於左右命也命也谷平公差人送至彭城因其告歸敢貢此以申倦切之意惟我師不以不肖見棄便風賜一教言庶不孤昔日知己之雅感幸感幸異時服闋北上當時造門墻以慰耿耿臨書無任瞻企即辰溽暑伏惟崇護以副下懷不宣

劉慤

北關舟次奉違台慈忽爾閱歲矣雖瞻依之念靡所則夕然職守所縻末由卒業函文以發憤悱之愚無任耿耿時方多虞夫子夙負珪璋之望顯然為社稷之依謂宜毗贊皇猷以綏寧海宇胡乃遭罹非咎龍卧明山有志之士不能不為之扼腕而歎况門人小子乎聖明在上諸老當路無不雅重翁者不父且當為蒼生強起翁願翁之舒以娛之也邇得家報云老母病久不離牀褥母子蓋相別者十年而老母衰齡亦已望八矣緣此旦夕徬徨茲以奉表入

賀萬壽行且有期不能登堂拜辭不勝瞻戀謹專使代申  
謝私伏乞台照萬萬

祗役北行忽爾數月起居缺然極切瞻仰方今聖皇嗣統  
徵用耆舊疇昔負奇遭譴之士固已接踵清朝布列庶位  
彬彬乎號稱賢才彙進矣老師以隆德厚養具瞻士林明  
詔初下其誰不曰安車之召首當及廬矣然竟未有以翁  
聞上者將何以定國是而協輿情耶昨過濟上惟與士南  
司空私共惋歎而已慙自惟薄劣甘出人後所期毋玷師  
門毋失家範然竟不知其所終惟高明終教而植立之幸  
甚幸甚

汪鏜

自抵金陵病冗交集又稽問候罪歎如何顧辱長者不即  
鄙遺瑤箋寵貺若隕自天刻感之私匪言可喻比讀近稿  
鑄辭道麗鋒穎入神若抱芳懷瑾不能釋手其所以發蒙  
開牘裨益良多矣敬謝敬謝疎拙如昨無一善狀不足言  
茲因公子先生還便謹此附候伏惟台慈垂鑒無任悚息  
鏜在門下為後學晚進且最淺劣無片長足以受知於長  
者而門下乃忘分接引惓惓教植且獎借過情禮遇優厚  
誠不知何修以得此惟有銜戢而已奉別台顏自冬涉春  
忽夏矣泝戀之私寤寐不忘人來詢知起居萬福無任慰  
浣鏜自入南都縉紳士相見無問識不識未有不扣翁起  
居真若泰山北斗之在望而使人躡景希聲爭相鄉慕也

鏗碌碌班行不能勉豎尺寸愧負如何謹勒疏奉候起居  
伏惟台慈原炤不宣備

曾承芳

芳也顓蒙賴翁誨植每佩服師資不敢昕夕誼置也參辰  
之流光易邁斗山之景戀彌深仰惟台衡夙望寰內具瞻  
方今南北多虞庶事未康正延領雲霓渴需霖雨翁以朝  
家元老豈可旦夕忘蒼生哉佇仰佇仰芳林卧數載已耽  
耕樵忽復出門覲然羞赧行次鵝湖與張白山公子道偕  
溯會稽東望神注若馳謹此申候福履旅郵倉遽伏惟鈞  
慈賜亮不宣

許應元

元不天遭罹閔凶不即殞墜仰厯台念伏承吊幣遠及哀  
拊勤厚荼楚號泣之中腐心刺骨自惟無以克稱至懷萬  
一存歿感刻寧有涯渙元自違台頽忽茲五載雖山斗瞻  
依日切而隨牒遠方無緣虔候起居披陳悃悞乃復尚存  
記憶仁卹有加追惟始終成就之德豈勝慙負比日恭論  
台候萬福殊慰下悃裔夷之禍沆可小康補牢顧犬實惟  
今日而未見有惕然深慮遠者竊計非命世之才無以  
濟茲巨難老先生龍卧盖久安得不為蒼生一出以底寧  
東夏耶元苟存視息未任樞趨顛跂之愚不勝悽悽輒因  
虞君回附陳固陋并申謝私瞻望階祀無任欽道感德之  
至伏惟台鑒不宣

吳百朋

惟翁雄文炳識曠視一世而朋之材質更出人下當節鉞填撫江右日自度無所章見得免督過幸矣乃又獨蒙鑒賞古靈薦書巍然首及使駕鈍下乘得伯樂一顧遂爾增價以至有今日門下知己之恩洞貫心膂焉能頃刻置也時方多事須才甚急翁之精力強幹正可為國家奮庸熙載批難解紛方且置之閑寂之地計今五六年矣朋每念及可為世道慨雖然國家無急則已有急必起翁無疑願翁重愛其身以有為也朋食臺粟已八年無一善狀可報門墻會司幕傅生以憂歸謹附一言候起居伏惟照察幸甚樞侍未涯臨發不任眷戀之至

二十年来百朋奔走風塵空存皮骨即老師左右亦曠然缺問罪何可文然一念懷德之私則未嘗頃刻釋也邇者聖天子御極圖任舊人如彼其急而負經綸大手如翁者有司顧莫以聞何哉昔新建伯王公以天挺人豪之才有大勲勞於國家乃為人所擠不能一日立於朝廷之上道大莫容才高見忌蓋自古而然矣難言哉難言哉百朋本一書生未試軍旅任處六年東征西勦迄無寧羽間關萬狀頭為半白今事甫定尚不免於讒忌者之口於是始知吾儕涉世之難也昨得報移南兵貳交承後即脫身去矣歸志已決不敢貪位冒進以貽門墻之羞敬因上猶簿鮑生全薄申遠忱并謝積愆伏惟鑒照幸甚樞侍未期臨風

不任懸企

汪道昆

公在朝野舉世望而震焉光則為龍儀則為鳳凡在鱗羽之族其孰能不宗即道昆無知北面喁喁久矣乃公高跼雄視置之眇眇之間沈生入閩拜命之辱公之折節下士先達所難既又微及芻蕘不遺一得道昆猶鶯鳩鼯鼠耳又焉能披九苞之彩襲九淵之珍乎哉且自束髮入官日不暇給汨汨吏事惡能成章乃今弛於負擔幸有餘力將欲自效尺寸躍溝瀆捨榆枋儻然與而進之願奮羽翼以從公後鶴鳴有和公能許之乎其未邪沈生材高屬在行役未遑叩其一二山陰卜築密邇鏡湖羈旅之人願定舍

館而後見長者凡百當專布茲不具陳

嘉則平叔遞入新安拜命之再無之論著累牘不啻披雲漢而快覩之明公折節而下無能何惓惓也頃者聖明在上側席求賢凡諸有名公卿畢起巖穴明公功德著矣顧嚼然避世而一意立言藉令位極人臣孰如不朽盛事所謂在此不在彼者章章矣昆不幸有狗馬病屏居篋中上之不能挾杖屨為采真之遊下之不能著一家之言藏之名嶽徒從諸初學學無生耳文苑文範計已畢工衡石名家張皇當代使後之學者知所嚮方此百世之利也嘉則見客無日不誦明公屬其東歸神與晨風俱往近作不足以當瓦缶何敢輒陳於鍾呂之間家弟私錄若干篇乃為

嘉則持去倘明公不廢樗散願受繩墨於大方幸甚幸甚

王世貞

自明公佐大司馬日世貞為西曹郎雖時時仰望風采然不敢以不肖姓名瀆閣者而會明公用家艱去尋出管留鑰中為讒所間不獲盡展其奇歸而湛思丹鉛中操天下風雅之柄開厨後淵藪甚休甚休世貞少迂不曉事亦妄有志述者偶以麋蹤為虞人所即鼎俎餘生喘伏於幽壑長林間久矣沈茂才包參軍數為言明公見念存至願欲賦離齋園竊自循省駑蹇之步無所得之於伯樂既薛子熙來出明公所集皇明文苑一二應酬雜篇亦辱齒收乃始恍然自驚所謂孔北海知世間有劉備耶然而愧卒不

勝喜至恣然汗下者恐不肖之終無可當也茲有情懇敢以薛生為紹百拜門下以請日者不自量為先御史大夫上書白寃狀得昭雪還故官且卜就寔矣以先大夫之嘗備乏貴地奔走御侮其微勞素辱明公知而世貞又辱不棄收從散帚之後不朽之托非明公其誰望哉先狀封覽伏惟憫其情矜其戇而賜之言或誅或贊且以煩貴郡諸作者如東明竹墟諸公獲均其惠後歲襄事畢當操小舟渡江叩謝秋林之役有見及者雖不文敢忘濯髮管而從公于邁哉離齋園詩倘脫稿得小赫號作黃庭楷登卷尤出望外歲杪寒甚唯為道強飯自愛不宣

昨歲附一書子熙去不謂蒙長者記憶而是時業自愛其

半殘之軀以庶幾稱門下客乃今併失之矣造物者見侮  
擲之風塵乞解不遂黽而就此今躑躅蒼雲間無所容面  
乃拜翁大教之辱又為離賚園四章宛然三百篇家範也  
稍令西河叟釋而序之益汗顏無當矣深欲造玄亭一傾  
倒未得東望明海烟霞五色令人奮飛無已則唯有手芝  
園集恭讀之耳然又似舍翁而與先秦西京建安開元諸  
賢揖讓也先君子奏議并所草近稿附嘉幣往祈賜斥正  
嘉則乃獲幸門下近作何狀聞令郎大奇人不審可一相  
見否大篇得手書八寸赫號欲以壓卷知當不吝初夏多  
濕為道為天下自愛

徐中行

中行至不肖然自童稚欽慕大雅顧尊卑分絕即欲一登  
龍門無繇也比釋褐西曹間從鄉曲後旅見門下竟未遂  
清燕之間亡何借重留京尋拂衣四明歸矣數歲間沈生  
薛生過敝邑具示執事巖居雅致及誦勝遊錄中兩莊記  
即白傅池上篇及王右軍蘭亭記足競爽異代矣近滄溟  
憲使弭節貴郡必有登臨之樂燕公太白並駕一時足稱  
東南之美矣即令不肖執鞭所忻忻焉適舊游董九華山  
人名潮者閩中士也精堪輿家及老氏言而寫照一技復  
自合作吳中士謂自顧虎頭以下不及也仰惟門下兼體  
好奇廣納九流之士乃敢紹介左右外鄙言一首率爾呈  
覽用表平生鄉往之私云爾非敢言詩也倘辱刊定擲之



幸甚輕冒尊嚴統希於感臨書不任惶恐

往中行伏讀翁游兩莊記及諸詞客游從之盛私心艷慕之不啻天上五城十二樓也為掃除之役寔忻欣焉顧張司馬望重當代安得一登龍門乎比董畫師來獲拜鼎翰不以疎賤鄙夷而降尊就卑獎借引掖備極優渥之旨感結盛誼不勝神揚恨不即問奇芝園之側也及夏孟祗役武昌襄漢者舊誦說開府遺愛登臨餘興即嶽時湘靈至今憑藉光寵而雄風白雪當夏交作則猶可想見翁之文章驚絕也第恨生晚不獲一當記室衙門為恨爾適貴郡冲宇督學以貢事被累暫還俟命將謁門下敬附承起居并以近稿請裁惟長者憐而教之鞅掌簿牒殊乏銓次統

冀慈貸炎暑更祈加慎衫衣以慰蒼生之望翹首四明曷任依依

中行不肖往屬董山人紹介門下仰辱長者獎納許以忘年之交中行幸甚藉第令得侍杖履鏡湖雲門間不啻足老矣詎謂牽役湘滇越在萬里未遑起居顧辱長者閔然旅人手教再辱既不獲即時奉報比客歲還里復以閩警遄行不獲造謝門下比入閩再屢教貺長者之誼至篤矣乃若明公揚扈詞盟引重千載而不腆燕詞謬承采錄感媿益不可言長公經術吏治自是家風即諸公無不推重者矧不肖夙荷世誼者乎李太僕行值鞅掌殊乏謹肅伏冀垂鑒翹首四明不任瞻戀拙刻別啓附上

吳國倫

國倫後進生無所因緣得及通德之門而廁北海之席每  
 以為恨然自弱冠至今游于學士大夫知閣下負王佐才  
 而又淹貫六籍精善諸體海內作者鮮不願為執鞭國倫  
 蓋心師之久矣芝園眾妙有非時目所易窺竊嘗擬之琬  
 琰為心蘭蘅澤手筆握霞標箋鳴雨粟以故叩之中宮商  
 詠之泣鬼神殆藝林之極界學海之大宗也豈逐日之步  
 所能追負山之力所可任耶又國倫在中祕時嘗見閣下  
 疏抃商中丞上櫻龍鱗下蹴虎尾聞者莫不髮上指冠即  
 商中丞無幸而楚人頌閣下大義至今無朝夕朱勃劉陶  
 不得專美矣國倫負俗無奇容有不肖之名聞於閣下者

皆過也辱閣下誤信而采之以為可與言嗟乎此希世之  
 構也荆璞見剖騏驎增價幸矣然使無連城之光而乏千  
 里之力不為玉尹牧師累乎楊別駕與賢從來兩奉教言  
 極感嘉惠國倫遠處裔土與夷為儕豺虎據途鯨鯢跋浪  
 書生不知大畧廓清無期蓋寢食兵革間未老而衰矣用  
 是舊業荒落一無可陳顧萬里寓踪恩同門內修詞好醜  
 不復自知敢以求質於閣下幸閣下繩墨之如有天幸則  
 買舟甬東從閣下登明山以望海固至望也

黎堯勳

堯勳無似昨緣請告家居歲餘仰見撫臺開布大政釐弊  
 凜於鈇鉞拯患速於風霆仁心朝運而夕流籌畧內安而

外戢首停輓運父老歡呼繼發倉庾流移底定勳竊慶鄉  
人獲被君子之澤喜觀蜀道復試武侯之才矣比謁台光  
益承至德領緒言而開教感惠愛而如春特庇還京越秋  
復部每逢達士亟問風裁輒據愚衷仰陳碩美人心信乎  
夙望公論協於僉同極知台鼎推賢行當入相尚冀雪山  
留重無以公歸愧乏月珠徒懷西望獨悲梓里極罹災旱  
之餘共戴鈞慈長活溝壑之衆在昔龍山使蜀當年荒政  
著聞然未有如今日之兩臺並勝千載一時者也未涯偉  
績岷山可鐫翹企深仁史編有待伏惟珍重仰副聖明謹  
因人回敬裁上謝堯勲無任悚息瞻戀之至

劉儒

恭惟臺下鳳鸞標格龍馬精神蘊牙籤千萬卷於胸中經  
濟可參天地奏錦瑟五十絃於筆下製作可泣鬼神自覽  
轡登車之後存溯川獨航之心琴鶴依依風裁凜凜嚴三  
尺之法貪吏望風立五花之磚群奸落膽烏臺樹淨冰履  
三層栢府鏡懸霜寒六月良法創建於一省放之四海而  
皆準善政規畫於一時傳之萬世而無弊且忠愛寓杜陵  
詩興名重雪山寧謚追神禹治功澤流錦水乃亘古今一  
見者也顧以精明之治而妄遭萋菲之言清議不平輿論  
共憤昔周公流言於管蔡卒啓風雷之變孔子被毀于武  
叔難掩日月之明聖人受誣自古皆然淺薄浪譏於今何  
損伏望道體康吉集百順于臺端德意優容置兩子於度

外上以答九重眷注之隆下以慰四海霖雨之望金甌名  
覆已彰錦繡之聲華水晶宮中便是神仙之窟宅德可久  
業可大早登黃閣之優游日之恒月之升永荷紫薇之暇  
豫下情無任歡欣踊躍之至為此具稟專差雅州儒學學  
正莫隱謹齋稟上問候須至稟者

劉應箕

宿沾德愛種種優渥感不可言昨海濱之役幸得親炙光  
顏辱老翁不替簪履進而教之旦夕啓迪裨益良多生平  
慶幸自擬萬戶侯不是過也待罪貴郡真若以蠅負山負  
屭之狀殊可耻笑然努力淬勵恪恭職守期以不負明時  
以酬知己真有不敢自侈者昨楊總戎見贈辱翁大雅之  
作則職業戎務所未修舉者尚多也瓊琚錦文燦爛光彩  
三四讀泚然忸怩深愧無以副老翁之望也竦亥如何別  
後將已伐條然東西支離未得少暇茲部使者按會稽郡  
不肖又以代署侍之瞻望四明欲見如渴謹此差使敬齋  
薄禮仰申謝私其他有懷未能盡述伏惟矜照臨楮無仞  
悽悽感德之忱

傅應禎

老翁喬嶽北斗海內人士孰不私心願為執鞭以攀附鱗  
翼猶恐恐然不蒙麾之門墻不肖於老翁尊則賢公祖義  
有舊子弟之雅乃今罪廢天涯數月矣距潭府不崇朝顧  
一刺未投豈執鞭攀附之私甘海內人士不若哉蓋自分

鼠竄應守竄窟非復可謾從杖履以辱前哲也然雖未能  
坐春風而讀其書亦可想見儀采邇來醉夢中得備覽芝  
園佳集暨外集二書真若金谷名園千奇萬異種種具存  
日探玩其中如坐蘭芷之室明德發為馨香薰襲骨髓古  
今寧復見此編哉至於皇明文範近代有數文字罔不入  
彀矣惟敝邑自明興以來先東廓公最著者僅得劉忠愍  
李忠文二公焉東廓先生之文在道德二公之文在節義  
均於世教有關况兩溪議論之英發曾為評品者收入筌  
蹄久矣願老翁搜而附之俾二公有知不奴隸揮斥於董  
賈之門可乎昔井蠅游于東海語以井中之天東海若咲  
而聽焉誠不忍以見小故棄也且韋布之士與分宜之流

苟一言有幾乎道者編中比比知名臣如二公老翁肯  
之哉或一時偶遺忘耳古人可以學書獄中則不肖議文  
於居罪之日或不為台下所否抱疴跬步弗前肅此代啓  
萬冀采納無任仰瞻

周光鎬

鎬愚菴涉世淺於其從政也多秕紊無所樹立蓋顯融者  
所不問矣顧仰有道長者則夙夜祇奉不逮老先生固名  
世之山斗人倫之領袖也弼亮勲猷夙著聲稱剛紹闡迪  
有功墳素尤千百世不朽物矣鎬何幸獲望顏色聆緒論  
自負於登龍執鞭之列實欣幸焉別踰歲時戀慕之私匪  
朝伊夕顧謂尋常寒溫無庸恩典記者乃辱翰貺存之寥

落下吏奚能乎堪此也感激感激每從越來者詢起居甚  
備湖山吟趣芝蘭榮發翩翩乎孰非吉祥善事哉慰藉良  
深吳越多鴻便願先生終惠教之茲附布訊伏乞鑒垂臨  
楮瞻邇無已

朱衡

昔在都中猶得時奉興居南還次武林荷賜尊教一入里  
中便無羽可乘幾欲專一价之馳而乏幹足瞻仰之私山  
川間之奈何詎惟尊師峻德偉績縉紳著察而龍馬精神  
天錫難老即雖未究經綸然眼底繁華不過過眼爾老師  
熙朝碩輔藝苑元楨名施當世貽軌範於後代又豈肯以  
彼易此乎如衡竊祿中外四十餘年曾何尺寸之建立有

負師訓祇自慚忤今惟閉戶靜理頗可怡心不足陳于師  
門偶因江新原人行附上福履千里神馳有懷難悉惟冀  
崇護鼎茵受天之慶



